

Incumbensa Deplazes concernent rimnadas da material sintetic en il chantun Grischun

Il chantun Grischun dispona d'ina buna rait da centers da rimnada per vaider, metal, ruments verds, vestgadira veglia e.u.v. Uschia pon quests materials lura vegnir reutilisads. Quai che funcziuna tar quests materials, funcziuna er tar ruments da plastic, sco quai che las rimnadas da material sintetic, introducidas cun success en ils chantuns Turgovia e Son Gagl (ZAB), cumprovan. Gia 250 vischnancas da la Svizra tudestga han permess systems da rimnada da material sintetic u introduci sezzas tals systems – quai mussa che la populaziun è pronta da furnir ina contribuziun per schanegiar las resursas e per proteger il clima.

Oz importa la quota da rimnada da material sintetic mo 11 %, ed i sa tracta principalmain da buttiglias da PET e da PE che vegnan rimnadas dal commerzi. Tschientmillis tonnas da material sintetic ch'è da princip bain reciclavel (cuppas da PET, PE e PP) na vegnan betg remanadas oz a la circulaziun, mabain destruidas en stabiliments per arder ruments.

Studis actuals postuleschan d'augmentar cleramain la quota da recicladi, perquai ch'i sa laschan spargnar fin a 2,4 tonnas CO₂ per mintga tonna material sintetic reciclà. Calculà per la Svizra sa reducescha uschia l'emissiun da CO₂ per pliras tschientmilli tonnas. Cunzunt lura, sch'i vegn rimnà er material sintetic da l'agricultura (folias da silo) e dal mastergn. Da quai na profita betg mo il clima, mabain er ils stabiliments per arder ruments. Quels en s'obligads da reducir lur emissiun da CO₂, ed els pon cuntanscher las finamiras fixadas, sch'els permettan u promovon schizunt sezs il recicladi da material sintetic.

Il recicladi da materials reciclavels n'è betg mo in cumond da la protecziun da l'ambient e dal schanetg da las resursas, mabain è er raschunavel ord vista da l'economia publica. Il recicladi da material sintetic stgaffescha plazzas da lavur e fa che nus essan pli independents d'imports da materias primas.

Sco tar tut ils systems da recicladi èsi impurtant er tar il material sintetic, che tschertas pretensiuns da qualidad vegnian observadas. Impurtant èsi er che las rimnadas da material sintetic vegnian finanzadas tenor il princip dal chaschunader e ch'i na resultian nagins custs supplementars per las vischnancas. Quai gartegia il meglier, sch'ils satgs da rimnada vegnan distribuids tras uniuns d'interess, sco quai ch'i vegn fatg en il chantun Turgovia. Per ch'er l'agricultura ed il mastergn sa participeschian, dovri eventualmain impuls supplementars.

Igl è perquai chausa dal chantun da definir, da coordinar e da realisar las mesiras adattadas per quest intent en collavuraziun cun las vischnancas.

La regenza vegn incumbensada d'introducir en tut il chantun ina rimnada da material sintetic per pudair reutilisar quest material en moda raschunavla, empè d'al destruir en stabiliments per arder ruments.

Cuira, ils 5 da december 2017

Deplazes, Pfenninger, Alig, Atanes, Baselgia-Brunner, Brandenburger, Bucher-Brini, Cahenzli-Philipp, Caluori, Casutt-Derungs, Cavegn, Caviezel (Cuira), Danuser, Dermont, Dosch, Felix (Scuol), Foffa, Gunzinger, Hardegger, Hitz-Rusch, Holzinger-Loretz, Jaag, Joos, Kunfermann, Locher Benguerel, Mathis, Monigatti, Niederer, Noi-Togni, Perl, Peyer, Pult, Thöny, Tomaschett-Berther (Trun), Vetsch (Claustra Vitg), Weber, Antognini, Berther (Segnas)